

Данияда муқаддас китоб ёқилишига Ироқ муносабат билдирди



18:45 / 23.07.2023 2666

Муқаддас китоблар ва диний рамзларни йўқ қилишга уриниш қоралашга арзийдиган, ор-номус туйғусини жунбушга келтирадиган иш. Дания Ташқи ишлар вазирлигининг хулосаси шундай.

Маҳкама эълон қилган баёнолда, жумладан, қуйидаги фикрлар келтирилган:

- Дания ҳукумати китоб ёқиб юборилишини қоралайди. Муқаддас матнлар ва бошқа диний рамзларга ўт қўйилиши ўзгалар динига нисбатан беписанд, шармандали ҳолат. Бундай амаллар жуда кўплаб одамларга салбий таъсир этадиган, турли дин ва маданиятлар ўртасида низо келтириб чиқарадиган ифвогарона ҳаракатдир.

Копенгаген полицияси 21 июль куни Ироқ элчихонаси яқинидаги норозилик намоёиши чоғида куйдирилган асар Муқаддас Қуръон нусхаси эканлигини айтмай, “бир китоб” ёқилганини маълум қилди. Дания ТИВ эса бу муқаддас китоб эканини тан олади.

“Ғарбдаги айрим кучлар Ироқни хорижий ваколатхоналар хавфсиз фаолият юрита олмайдиган мамлакат сифатида кўрсатишга ҳаракат қилмоқда, деди мамлакат Президенти Абдул Латиф Рашид Швеция ва Даниядаги Қуръон нусхалари ёқилиши билан боғлиқ сўнгги воқеаларни шарҳлар экан.

Етакчининг “Уларнинг нияти ироқликларни гиж-гижлаш ва давлатимизни хорижий миссиялар хавфсиз бўлмаган ҳудуд, деган тасаввур уйғотиш”, деган сўзларини “INA” агентлиги иқтибос қилган.

Президент ишонч билдиришича, мазкур ҳодисалар режаланган ва “мамлакат фуқаролари ҳамда муҳожирларига зарар келтириш”га қаратилган.

Манба: uza.uz